

而柔然與魏又雄強於東北外圍。鄯善當南道之衝，爲歷來野心家所必爭。時魏已擁有涼土，勢必擴展至西域，乃必然之勢也。無諱與魏爲敵，魏決不使無諱安據要衝，亦爲必然之勢也。故無諱亦謀向西北擴展，因闕爽之請，即率衆從焉耆東北趨高昌，遂留屯高昌。無諱卒，其弟安周繼據之。清光緒中，德國奈柯克在高昌故城中發見沮渠安周造寺碑及所寫佛經，（六）可以爲證；則沮渠氏之王高昌，蓋已久矣。時無諱既去鄯善，魏遂乘機而入。魏書西域傳稱：『魏太平眞君六年，鄯善王擁隔交通，魏太武帝遣萬度歸討伐之，擒其王眞達，以韓牧爲假節征西將軍領護西戎校尉鄯善王以鎮之，賦役其人民，比之郡縣。』鄯善遂爲魏有。但魏雖平定鄯善，尙不及且末，故且末仍爲鄯善王所據。及魏大統八年，其兄鄯善王米率衆內附，而舊時鄯善領土遂全入於魏矣。按鄯善有國始於漢昭帝元鳳四年（公元前四四年），至魏太平眞君六年（公元四四五年）亡國，共有國凡四八九年也。

附論：鄯善與樓蘭國都問題

樓蘭國歷史既如上述。至樓蘭與鄯善之都城問題，因近數十年來羅布淖爾遺址續有發現，關於國都位置問題，遂引起東西學者之注意。今據考古上之材料，參稽古籍，爲之疏證如下：

一、在南說 此爲斯坦因等所主張，日人藤田豐八和之。據斯坦因考古記所述，在一九〇七年一月在密遠西藏堡壘工作時，發現古西藏文書所記錄之地名，有大納布城、小納布城。按大納布城即婁羌，小納布城即密遠，可證密遠遺址即爲扞泥城舊址，中國史書稱此爲鄯善之古東城。（七）按斯坦因氏所述，根據中國之史書，即指北魏時酈道元之水經注。酈注河水篇引釋氏西域記云：『且末河東北流，逕且末北又流而左會南河，會流東逝，通爲注濱河。注濱河又東逕鄯善國北治伊循城，故樓蘭之地也。……其水東注澤，澤在樓蘭國北扞泥城，其俗謂之東故城。』按且末河即車爾成河，東北流與塔里木河會而東流，注濱河蓋其末流也。其水由西而東，故先逕鄯善國之伊循城，東至扞泥城注澤。斯坦因以卡爾克里附近之古蹟當漢之伊循城，密遠舊址當扞泥城。又以水經注有『樓蘭國北扞泥城』之語，遂以扞泥城爲樓蘭舊都也。由是言之，是伊循城在扞泥城西，而扞泥城在東也。如